



Gula bakal naik harga? Pengeluar dakwa kos pengeluaran meningkat 30%

FMT Reporters - May 20, 2022 11:45 PM



Harga gula runcit di Malaysia adalah yang termurah di rantau ini dengan harga semasa pada RM2.85 sekilogram, kata Ketua Pegawai Eksekutif Kumpulan MSM Malaysia Holdings Bhd Syed Feizal Syed Mohammad. (Gambar Bernama)

PETALING JAYA: Pengeluar utama gula tempatan berpandangan ada keperluan bagi kerajaan menyemak semula harga gula sejajar dengan tekanan kos ketika ini.

Ketua Pegawai Eksekutif Kumpulan MSM Malaysia Holdings Bhd Syed Feizal Syed Mohammad, berkata adalah wajar untuk kerajaan meneliti semula harga gula selepas harga komoditi itu naik satu sen sekilogram, dalam tempoh 11 tahun lalu.

Beliau berkata, kos pengeluaran telah meningkat lebih 30% ketika ini berikutan kenaikan harga gas, fret dan pergerakan tukaran asing.

Katanya, pihak industri sentiasa mengadakan dialog dengan kerajaan berhubung perkara itu dan kerajaan memahami keadaan yang dihadapi industri.

“Sejak 2011, kenaikan harga gula hanya satu sen sekilogram dalam tempoh 11 tahun. Memandangkan tekanan kos sekarang ini mungkin wajar kerajaan meneliti balik harga gula.

“Jaminan kami adalah untuk rakyat dan negara, tapi pada masa sama kami perlu untung juga,” katanya menurut laporan Berita Harian.

Mengulas masa sesuai untuk kenaikan harga gula, Syed Feizal, berkata kenaikan harga gula adalah untuk segmen pengguna bagi satu kilogram dan bukan membabitkan industri.

Beliau berkata, kesan kenaikan dijangka tidak mempunyai kesan ketara kepada isi rumah memandangkan kegunaan gula bagi isi rumah adalah kira-kira satu kilogram sebulan.

Katanya, harga gula runcit di Malaysia adalah yang termurah di rantau ini dengan harga semasa pada RM2.85 sekilogram.

“Harga gula di Thailand adalah kira-kira RM3.50 sekilogram dan Singapura dijual pada RM5.90 sekilogram,” katanya.

Syed Feizal berkata, pihak industri menyerahkan kepada kerajaan untuk membuat keputusan mengenai semakan semula harga gula dan berharap kerajaan membuat keputusan sebaiknya.

Mengenai bekalan gula, Syed Feizal berkata, bekalan gula dalam negara lebih daripada mencukupi dan tiada keperluan untuk mengimport komoditi itu bagi memenuhi keperluan pasaran tempatan.

Beliau berkata, MSM juga tidak terkesan oleh penghapusan permit kelulusan AP bagi bahan makanan secara serta merta bagi memastikan bekalan makanan negara mencukupi.

“Pengeluaran (gula) tempatan mencukupi untuk negara, jadi tidak perlu import. Gabungan kapasiti MSM dan Central Sugars Refinery Sdn Bhd adalah kira-kira 2.8 juta tan dan permintaan negara hanya 1.5 juta tan,” katanya.

Media: FMT

Link: <https://www.freemalaysiatoday.com/category/bahasa/tempatan/2022/05/20/gula-bakal-naik-harga-pengeluar-dakwa-kos-pengeluaran-meningkat-30/>